

Concierto di Pasco cu Coronan

sTA. CRUZ -- Fundacion Arubano di Arte/FUNDARTE en cooperacion cu Paseo Herencia ta presenta: “Un Anochi Celestial”, cu ta tuma lugar diadomingo 23 di December proximo cuminzando pa 6.30 di atardi.

Na e Concierto di Pasco, lo tin presentacion di Coronan di varios distrito cu lo interpreta canticanan famoso di Pasco.

E coronan cu ta presenta ta : Coro Tutti Fruti, Coro Crystal di Paradera, Coro Grupo Alegria di Sta. Cruz, Coro Sta. Anna di Noord, Coro Alegria Hubenil di Savaneta, Coro Vlam di Amor di Sta. Cruz, Coro La Escala, Grupo Melange, Coro Cristo Rey di Brasil, The Teen Angels y Coro Rejoice Ministry di Hulanda.

Durante e anochi lo tin presentacion di varios solista conoci y entre nan tin varios cu lo ta un sorpresa grandi y agradabel pa e publico.

Pa clausura e bunita anochi di Concierto di Pasco, tur koor hunto lo canta 2 cantica hopi conoci.

Aki ta trata di un koor di alrededor di 200 cantante, bao direccion di sra. Maybelline Arends-Croes.

Durante di e Concierto lo tin presentacion di un “Pesebre Bibo” cu integrantenan di Grupo di Teatro Mascaruba. Ora Maria & Hose yega e

staal, nan lo encontra un pastor ta cuidando su burico, un baca y un carne rond di e pesebre.

Mientras tanto e Tres Reynan ta cana rond y ta busca unda e rey di tur reynan a nace.

E “Pesebre Bibo” sin duda lo ta un atraccion grandi pa e publico y principalmente pa e muchanan.

E anochi aki, Paseo Herencia lo estrena un holoshi grandi riba Plaza Padu.

Fundacion Arubano di Arte/FUNDARTE lo tin un stand unda e publico lo por disfruta di ayaca, ham di Pasco, pastechi, chuculati di pinda cu macaron y diferente sorto di bolo.

En bista di e cantidad di persona y turistanan cu lo asisti na e “Anochi Celestial”, seguramente tur espacio pa sinta lo ser ocupa y ta sugeri na esnan cu no por para hopi, pa nan bin cu un klapstoel of kruk.

Inmediatamente despues di e Concierto, lo tuma lugar e show fantastico di awa na unda e fonteinnan lo baila riba ritmo di musica y luz.

Fundacion FUNDARTE y Paseo Herencia ta invita boso pa bin diadomingo 23 di December cu henter famia y pasa un anochi hopi bunita den un ambiente total di Pasco.

Fundacion Fundarte y Paseo Herencia ta desea pueblo Arubano un Feliz Pasco y un Prospero Año.